

yrði tiltekinn, hefir lifað reglulegum lifnaði; og í annan stað borið undir ráðgjafann sjerstaklegt tilfelli af því tagi, sem nýlega hefir komið fyrir.

61
13. apríl.

Út af þessu er eigi látið undan falla að tjá yður þjónustusamlega til þóknanlegrar leiðbeiningar og frekari birtingar, að það er hvorttveggja, að eigi hefir svo verið tilætlazt, er reglugjörðin var samin, að gjörð yrði nokkur undantekning frá tjeðri ákvörðun, þegar svo stendur á sem hjer ræðir um, enda finnur ráðgjafinn eigi ástæðu til að gjöra neina breytingu á reglugjörðinni í þessu efni. Aptur á móti er það að segja um stúdent þann, Pjetur Jónsson, er getur um í brjefi yðar, og eigi hefir verið reglulega vísað burt frá skólanum, heldur yfirgaf skólann sjálfur í júlímánuði f. á., áður en burtreksturinn átti sjer stað, og sem leyft hefir verið eptir ráðstöfun yðar að hlýða á fyrirlestra þetta skólamissiri og láta hlýða sjer yfir sem óreglulegur lærisveinn, að ráðgjafanum þykir rjettast að leyfa, að hann sje tekinn inn í skólann aptur í byrjun næsta skóla-árs, og þannig, að tíminn, sem hann hefir verið í skólanum sem óreglulegur lærisveinn, verði eigi talinn með í hinum fulla námstíma, 4 árum; og eins er það vitaskuld, að vísa verður honum í burtu undir eins, ef hann gjörir sig aptur sekan í drykkjuskap eða annari óreglu, og að eigi má taka hann inn í skólann, ef hann gjörir brotlegur í millibílinu til 1. október þ. á.

— *Brjef ráðgjafans fyrir Ísland til landshöfðingja um lán handa prestakalli.* — Út af bóнарbrjefi, er hingað barst með þóknanlegu brjefi yðar, herra landshöfðingi, dags. 15. febr. þ. á., frá prófastinum í Dalasýslu, síra Jóni Guttormssyni, um að veitt sje Hjarðarholtsprestakalli í tjeðri sýslu 1000 króna lán úr viðlagasjóði til endurbóta á túni prestsetursins, einkum með vörslugörðum og skurðum, er yður hjer með þjónustusamlega tjáð til þóknanlegrar leiðbeiningar og frekari ráðstafana, að beiðni þessi er veitt, með þeim kjörum, að lánið sje borgað aptur á 10 árum, 100 kr. á ári, og greiddir í vöxtu 4 af hundraði um árið af því, sem eptir er af höfuðstólnum í hvert skipti.

62
13. apríl.

— *Brjef ráðgjafans fyrir Ísland til landshöfðingja um lán handa Akureyrarkaupstað.* — Út af bóнарbrjefi, er hingað barst með þóknanlegu brjefi yðar, herra landshöfðingi, dags. 4. febr. þ. á., frá bæjarfógetanum á Akureyri fyrir hönd bæjarstjórnarinnar þar, um 6000 kr. lán handa kaupstaðnum úr viðlagasjóði, og eru 4000 kr. af því ætlaðar til aðgerðar að kirkjunni, og hitt til vegagjörðar á Akureyri sjálfri og á Oddeyri, er yður hjer með þjónustusamlega tjáð til þóknanlegrar leiðbeiningar og frekari ráðstöfunar, að beiðni þessi er veitt, með þeim kjörum, að lánið sje borgað aptur á tíu árum, $\frac{1}{10}$ hluti þess á ári, og að greiddir sjeu í vöxtu 4 af hundraði um árið af því, sem eptir er af höfuðstólnum í hvert skipti.

63
13. apríl.

— *Brjef landshöfðingja til amtmannsins yfir suður- og vesturumdæminu um óendurgoldinn sveitarstýrk sem meinbug á hjónabandi.* — Í brjefi dags. í gær, tjáid þer mér, herra amtmaður, þóknanlegt álit yðar um fyrirspurn þá, er jeg sendi yður með brjefi mínu 30. f. m., frá Jóni Sveinbjarnarsyni á Draghálsi og Jóni Erlendssyni á Svarfhóli sem svaramönnum Guðmundar nokkurs Hjalmarssonar, um það hvort óendurgoldinn sveitarstýrkur, er lagður hefir verið óskilgetnum börnum hans til framfærslu af Skorradalshreppi, sje því til fyrirstöðu samkvæmt tilsk. 30. apríl 1824, 3. gr. 10 tölul., að hann bindist í hjúskap, og læt jeg yður nú þjónustusamlega tjáð, herra

64
16. maí.

64 amtmaður, það er nú skal greina, til þóknanlegrar leiðbeiningar og birtingar fyrir hlut-
16. maí. aðeigöndum.

Með því að óskilgetin börn eiga sömu sveit og móðir þeirra, svo sem segir í G. gr. reglugjörðar 8. janúar 1834, og því verður svo að virða, sem styrkur sá, er lagður er óskilgetnum börnum, sje veittur móðurinni, getur slíkur óendurgoldinn sveitarstyrkur eigi verið því til fyrirstöðu, samkv. tilsk. 30. apríl 1824, 3. gr., 10. tölul., að faðirinn bindist hjúskap við einhvern annan kvennmann en móður hinna óskilgetnu barna sinna, enda verður og engin breyting á hreppshelgi barna þessara, þótt faðir þeirra kvongist.

65 — *Brjef landshöfðingja til amtmannsins yfir suður- og vesturumdæminu um fjár-*
21. maí. *rekstrabann.* — Með þóknanlegu brjefi frá 30. f. m. hafið þjer, herra amtmaður, sent mjer beiðni, þar sem sýslunefndarmennirnir í Borgarfjarðarsýslu fara þess á leit, að bannið gegn því að reka og flytja fje yfir takmörk hins kláðagrunaða svæðis verði numið úr gildi frá næstu fardögum, þar sem nú sje ástæða til að ætla, að kláðagrunurinn sje horfinn.

Fyrir því læt jeg ekki undan falla að tjá yður, herra amtmaður, til þóknanlegrar leiðbeiningar og birtingar fyrir hlutaðeigöndum, að jeg að vísu vona, að kláðaveikinni sje með öllu útrýmt af svæði því, er fjeð hefir verið grunað á, en jeg samt álít það skyldu mína gagnvart fjáreigöndunum fyrir utan svæði þetta, að láta hið nefnda rekstrabann standa óbreytt í sumar, og get því ekki veitt það, sem farið hefir verið fram á. Þar á móti má ekki varna fjárflutningum eða rekstrum úr einni sveit í aðra innan takmarka kláðasvæðisins, og ástæða virðist vera til að veita einstökum fjáreigöndum, er ætla sjer að flytja búferlum í vor yfir þessi takmörk, undantekningar frá rekstrabanninu. Jeg vil þess vegna hjer með fela yður, herra amtmaður, á hendur, að veita slíkar undantekningar, ef sýslunefndin í hjeraði því fyrir utan kláðasvæðið, er hlutaðeigandi bóndi ætlar sjer að flytja í eða úr, mælir með því, að hann fái leyfi til að flytja allt fje sitt eða nokkuð af því, og ber þá í hverju einstöku tilfelli að tiltaka hin nákvæmari skilyrði, sem nauðsynleg þykja til að hafa eptirlit með fje því, sem flutt er.

EMBÆTTASKIPUN.

Hinn 12. f. m. þóknadist hans hátign konunginum allramildilegast að skipa bæjarfógeta í Reykjavík og sýslumann í Gullbringu- og Kjósarsýslu Lárus Eðvard Sveinbjörnsson 2. meðdómara og dómsmálaritara í landsfyrirjettinum, cand. juris Sigurð Jónsson sýslumann í Snæfellsness- og Hnappadalssýslu frá 6. júní þ. á., og cand. m. & ch. Guðmund Guðmundsson hjeraðslækni í 19. læknishjeraði.

Hinn 7. þ. m. skipaði landshöfðingi cand. theol. Sigurð Gunnarsson prest að Ási í Fellum í Norður-Múlaprófastsdæmi, — og 10. s. m. síra Hjörleif Guttormsson á Tjörn í Svarfáðardal prest að Völlum í Svarfáðardal í Eyjafjarðarprófastsdæmi.

ÓVEITT EMBÆTTI.

a. er ráðgjafinn fyrir Ísland hlutast til um veitingu á :

— Bæjarfógetaembættið í Reykjavík. Árslau 3000 kr., og óvissar tekjur samkvæmt 2. gr. í lögum 14. desbr. f. á. um laun sýslumanna og bæjarfógeta. Skrifstofukostnaðarendurgjald 1000 kr. á ári.
— Sýslumannsembættið í Gullbringu- og Kjósarsýslu í suðurumdæmi Íslands. Árslau 3000 kr., og óvissar tekjur samkvæmt 2. gr. í lögum 14. desbr. f. á. um laun sýslumanna og bæjarfógeta.

Søki aðrir en Íslendingar um þessi embætti, verða þeir hinir sömu að láta bónarbrjefum sínum fylgja tilheyrilegt vottorð um kunnáttu í íslenzkri tungu, samkvæmt konungsúrskurðum 8. apríl 1844, 27. maí 1857 og 8. febrúar 1863.

Embættin voru auglýst laus 30. apríl þ. á., og eiga bónarbrjef um þau að vera komin til ráðgjafans 11. ágúst þ. á.

b. er landshöfðingi veitir :

Tjarnar-prestakall í Svarfáðardal í Eyjafjarðarprófastsdæmi, met. kr. 1138,^{sz} augl 13. þ. m. Umbod þykkvabæjar- og Kirkjubæjar klaustra og Flögujarða í Skaptafellsýslu frá fardögum 1879. Bónarbrjef um umbodið eiga að vera komin til landshöfðingja 1. desbr. þ. á.